



МОНГОЛ УЛСЫН ДЭЭД ШҮҮХИЙН
НИЙТ ШҮҮГЧИЙН ХУРАЛДААНЫ
ТОГТООЛ

2023 оны 10 сарын 02 өдөр

Дугаар 33

Улаанбаатар хот

Монголын Либерал Ардчилсан нам
(МоЛАН)-ын дарга өөрчлөгдсөнийг
бүртгүүлэх тухай

Монгол Улсын дээд шүүхийн нийт шүүгчийн хуралдааныг Ерөнхий шүүгч Д.Ганзориг даргалж, танхимын тэргүүн Г.Алтанчимэг, Д.Мөнхтуяа, Ч.Хосбаяр, шүүгч Б.Амарбаясгалан, Г.Банзрагч, Д.Батбаатар, С.Батдэлгэр, М.Батсуурь, Х.Батсүрэн, Б.Батцэрэн, Н.Баярмаа, П.Золзаяа, М.Пүрэвсүрэн, П.Соёл-Эрдэнэ, С.Соёмбо-Эрдэнэ, Б.Цогт, Ц.Цогт, Д.Цолмон, Д.Эрдэнэбалсүрэн, Х.Эрдэнэсүвд нарын бүрэлдэхүүнтэй хийсэн хуралдаанаар,

Монголын Либерал Ардчилсан нам (МоЛАН)-ын дарга өөрчлөгдсөнийг бүртгүүлэх тухай өргөдлийг шүүгч П.Соёл-Эрдэнийн илтгэснээр хэлэлцээд

ТОДОРХОЙЛОХ нь:

Монголын Либерал Ардчилсан намын ерөнхий нарийн бичгийн дарга Г.Анхбаяраас "... Монголын Либерал Ардчилсан нам /МоЛАН/-ын дарга Т.Төмөрмөнх нь 2004 оноос намын даргын ажлаа хаяж, гадаад улс руу явсан тул үүрэгт ажлаас нь огцруулах шаардлага үүссэн. Тус намын дүрмийн 3 дугаар зүйлийн 3.10 дахь хэсэгт намын Ерөнхий нарийн бичгийн дарга нь "намын даргын эзгүйд түүний үүргийг орлон гүйцэтгэнэ" гэсэн эрх олгосон болно. Манай нам 2023 оны 08 дугаар сарын 15, 19-ний өдрүүдэд Улсын дээд шүүхийн нийт шүүгчийн хуралдааны 2023 оны 07 дугаар сарын 03-ны өдрийн 29 тоот тогтоолоор батлагдсан дүрмийн дагуу хуралдаж, МоЛАН-ын даргыг шинээр сонгосон тул намын даргын өөрчлөлтийг Улсын төрийн намын тухай хуулийн дагуу улсын бүртгэлд бүртгэж өгнө үү" гэжээ.

ҮНДЭСЛЭХ нь:

Улсын дээд шүүхийн нийт шүүгчийн хуралдаанаас дараах үндэслэлээр Монголын Либерал Ардчилсан намын дарга өөрчлөгдсөнийг бүртгэж шийдвэрлэлээ.

Улс төрийн намын тухай хуулийн 5 дугаар зүйлийн 5.1.4-т "нам дотоод асуудлаа ардчилсан зарчмыг баримтлан олонхийн саналаар шийдвэрлэх" гэж заасан, энэ тохиолдолд намын дарга өөрчлөх асуудлыг тухайн намын дүрэмд заасан журмаар, олонхийн саналаар шийдвэрлэсэн нь хуулийн дээрх заалтад нийцэж байна.

Намын дүрмийн 3.7.9 дүгээр зүйлийн 1-д "Намын Бүгд хурал дараах үйл ажиллагааг эрхлэн гүйцэтгэнэ", 3.7.9 дүгээр зүйлийн 14-т "Бүгд хурлаас намын даргыг а.Сонгуулийн үр дүнгээр огцруулах, сонгох ..." гэж тус тус заасан буюу Монголын Либерал Ардчилсан намын дүрэмд зааснаар намын даргыг сонгож, өөрчлөх эрх нь намын Бүгд хуралд олгогдсон байна.

Улсын дээд шүүхийн нийт шүүгчийн хуралдааны 2023 оны 07 дугаар сарын 03-ны өдрийн 29 дүгээр тогтоолд “Тус намаас 2023 оны 04 дүгээр сарын 12-ны өдрийн өргөдөлд нэмж ирүүлсэн баримт болох Ээлжит бус Их чуулганы 2008 оны 04 дүгээр сарын 04-ний өдрийн 08/005 дугаар тогтоолоор сонгогдсон Бүгд хурлын 70 гишүүнээс 2023 оны 05 дугаар сарын 20-ны өдрийн Бүгд хурлаар 60 гишүүний бүрэн эрхийг улираан батламжилсан байна” гэж заажээ.

Монголын Либерал Ардчилсан намын 2023 оны 08 дугаар сарын 19-ний өдрийн Бүгд хурлын товыг 60 гишүүнд мэдэгдсэнээс, 47 гишүүн оролцож намын дарга Т.Төмөрмөнхийг огцруулж, Б.Өлзийдүүрэнг сонгосон нь олонхийн саналаар асуудлыг шийдвэрлэх зарчимд нийцсэн байна.

Улсын бүртгэлийн ерөнхий газрын 2023 оны 09 дүгээр сарын 05-ны өдрийн 9/7976 тоот албан бичгээр “... Т.Төмөрмөнх нь биеийн давхцахгүй өгөгдөл (гарын хурууны хээ)-ийн бүртгэлд бүртгүүлээгүй ...” гэж, Т.Одонцэцэг, Х.Сувд нарын “... Т.Төмөрмөнх нь гадаад улс руу гараад явсан, одоо ямар ч холбоо харилцаа байхгүй” гэсэн тайлбараас үзэхэд, Т.Төмөрмөнх нь улс төрийн үзэл бодлоо илэрхийлж, намын үйл ажиллагаанд идэвхтэй оролцдоггүй болох нь тогтоогдож байх тул түүнийг намын даргаас чөлөөлж, шинээр намын дарга сонгосон нь тухайн намын Бүгд хурлын эрх хэмжээнд байна.

Монгол Улсын шүүхийн тухай хуулийн 25 дугаар зүйлийн 25.8.8, 26 дугаар зүйлийн 26.1-д заасныг удирдлага болгон ТОГТООХ нь:

1.Улс төрийн намын тухай хуулийн 5 дугаар зүйлийн 5.1.4, 11 дүгээр зүйлийн 11.1-д заасныг баримтлан Монголын Либерал Ардчилсан намын даргаар Б.Өлзийдүүрэнг бүртгэсүгэй.

2.Өргөдөл гаргагчаас улсын тэмдэгтийн хураамжид төлсөн 150,000 төгрөгийг улсын орлогод хэвээр үлдээсүгэй.

ХУРАЛДААН ДАРГАЛАГЧ,
ЕРӨНХИЙ ШҮҮГЧ

Д.ГАНЗОРИГ

ИЛТГЭГЧ ШҮҮГЧ

П.СОЁЛ-ЭРДЭНЭ